

07 AUG 1998

PERDANA MENTERI LAOS LAWAT MALAYSIA ISNIN INI

KUALA LUMPUR, 7 Ogos (Bernama) -- Perdana Menteri Laos Sisavath Keobounphanh dijadual akan membuat lawatan rasmi tiga hari ke Malaysia mulai Isnin, kata Kementerian Luar hari ini.

Beliau akan mengetuai delegasi 12 orang yang terdiri daripada menteri-menteri kanan dan pegawai kerajaan, menurut Wisma Putra dalam satu kenyataan hari ini.

Lawatan Keobounphanh ke sini adalah pertama kali oleh ketua kerajaan Laos sejak negara itu menjadi anggota Asean tahun lepas.

Asean terdiri daripada Brunei, Indonesia, Laos, Malaysia, Myanmar, Filipina, Singapura, Thailand dan Vietnam.

Perdana Menteri Laos itu dijadual akan mengadakan perbincangan dengan Perdana Menteri Datuk Seri Dr Mahathir Mohamad mengenai isu-isu dua hala, serantau dan antarabangsa.

Krisis kewangan dan ekonomi rantau ini serta usaha-usaha bersama bagi menangani masalah itu juga dijangka menjadi tumpuan utama pada perbincangan itu, menurut Wisma Putra.

Kedua-dua Perdana Menteri juga akan menyaksikan majlis menandatangani dua perjanjian mengenai perdagangan dan kerjasama pelancongan dua hala antara Laos dan Malaysia semasa lawatan Keobounphanh itu, menurut kenyataan itu.

-- BERNAMA

APG RHM